

近人無詩非無詩也。公於末流而不能上窮其源，所以舉目皆詩而其實無詩也。蓋詩之有源如河流，然源出西域崑崙，滌洞奔折，歷塞垣，經雍豫，徐揚萬里而後，滙於溟渤。蓋其源遠者其流長也。樂府始於漢，唐山夫人有房中歌。李延年司馬相如作十九章歌，自後奇崛變幻，體製不一，是爲樂府之源。古詩十九首詩之正則，蘇李以降，陳思嵇阮陶謝之徒相繼迭出，是爲五言之源。近體昉於唐代，景龍開寶諸公亦律體絕句之源。其較然也。竊

怪近人以詩鳴者綺靡庸瑣追逐時趨石湖渭南
終身墨守而昭明所編郭茂倩所輯陳杜沈宋暨
開寶貞元諸大家之詩如刺目焉而不願寓目猶
觀水者置身溝澮之旁傲然自睨而謂江河在是
亦見其立涸焉而已矣謝山夢先生窮詩之源而
不沿其流者也先生具軼倫之才貫穿百家其胸
次足以包羅眾有其筆力足以摧挫古今而能前
矩是趨志高格正樂府胚胎漢人五言咀含選體
卽降格亦近王韋七言馳驟豪盪宗太白沉鬱頓

挫宗少陵離奇壞偉宗昌黎近體亦不肯落大厯
以下奔湍急硤百怪滉漾大波爲瀾小波爲淪惟
發源崑崙故能經絡九州而混混不竭也先生之
詩豈得以汎泉濶澗目之乎哉詩凡若干卷皆奉
使于役經中州江左成於登臨校士餘者憑弔古
蹟悲閔哀鴻勗勵德造惓惓三致意焉準之六義
比興居多蓋得乎風人之旨矣至平日歌天寶詠
清廟矢音卷阿鋪張宏休揚厲偉績應有與雅頌
相表裏者而此猶九川之一隅也然讀是編者因

其波流會其有本隨一隅一津涯浦激而沂所從
出亦可由砥柱積石而上窺星宿之源也夫
乾隆甲戌仲春年家同學弟長洲沈德潛題

大谷山堂集序

同社友唐元素司馬始以表章遺獻將合大谷山堂并睫巢雷溪諸集彙爲一編成茲三種未及印行而其中輟今以其版歸余校讎旣竟爰爲之序曰蓋自輿地之學別爲顯家凡緣生述征之編師知聘游之記前史著錄隸歸乙簿於是沿流忘源不復知爲詩教所出矣粵稽春秋之世列國通問爲使臣者敦睦冠裳之會雍容樽俎之間無不賦詩見志吐納以爲身文宣聖有言曰誦詩三百

使於四方不能專對雖多亦奚以爲蓋奉命出疆
辭辨所資莫備於詩所謂不學詩無以言也蒙古
夢文子先生以詞苑英賢游參樞要生平勳績尤
在河渠觀其所浚六塘開空二壩李渤之條鄆泄
乃慶澹菑賈讓之議繕完非云上策殫精規畫厥
功懋焉又其兩督河南江蘇學政充江南鄉試正
考官一藻芹扇其芬郁桃李仰其栽成協職文衡
固無待言唯是李彪銜命颺六度之榮張薦善言
馳三使之譽先生皇華原隰總轡咨諏輶車所經

動成吟諷何竝美俗之選子節出境之才先生有
焉夫詩之爲道太師周訪觀好惡於民風行人聽
辭衍縱橫之家學後世平原敕遺興致雨之祥益
部逆征應流星之貴非不傳芳騰牒見美當時至
於詠入篇章則未之聞焉先生北壁羈棲東阿臨
越龍門憩乘尋幽徑以忘疲虎阜攀林指層巖而
遙睇又或河上舊宅則懷高蹈之蹤山下明堂則
挾尊王之義往往聯辭綺合竦韻鏘流毛公詩傳
云山川能說可爲大夫其先生之謂矣夫詩自掇

采以降材翰之士聲律研討景物流連逐靡忘歸
去而益遠彼叔源西池之作隱侯東園之吟亦祇
記其游覽自爲勞歌而已昔昭明選詩擧半眾體
獨於士衡入洛肅振朝纓延年還都聿循舊軌比
其義類名曰行旅蓋正叔順塗元暉紆組固不與
廬山坐瞰帆海安流可一例同編也先生持節高
騫乘輅遠邁相如同其論蜀文通賦其望荆豈非
四牡載驅服勞王事九變復貫妙選知言者哉若
夫詩之蕭寥澄曠激楚蒼涼處春華之時造秋實

之境聽松詮品已有定評乃闡古者風詩之旨所以錄輔軒之異語備履絢之周知著之此篇庚申上巳日吳興劉承幹

大谷山堂集卷一

謝山夢 麟文子

蘊隆

蘊隆

天子念畿輔望澤發粟省獄詔庶正上闕矢是日

雨降大霑漑而臣賦詩也

蘊隆載赫朱揚孔明叶童童蟲蟲角躔于黃僭如

快如震霆勿張奚九宇既澤恡予冀邦曾一夫其
奈天心弗傷 皇曰於虘胡我人聿當

晨題于垣溽雲載蒸暮矚于淵炎塵再興奚昊天
孔昭燭予弗靈疇娛夫媵疇酣夫庭疇弗虔弗刑
我氓不幸余一人是丁

迺虔迺雩維郊維宮幣瓏奠瘞弗愛式崇衍我后
稷載休載宏叶昇煙動虛高靈屬穹爾羣公百司
明神敬恭匪弛我里疾下民實痾

皇咨司農女畫女籍女貸女積台藐躬是癩彼氓
曷活 皇咨士師女平女直女奪女拔台藐躬是
鞠氓艱孔澤 皇咨庶正我惑我側脫緘轉舌靡

不我周弗德胡獲

既修既周既釋既游或謹于舟或衢而謳豕宰休
休師氏由由迺滄迺油載漚載優流泉活活黍稷
發發士婦啞啞聿藝我樹植

轡之柔矣

轡之柔矣補佚也

轡之柔矣馬之統矣俾爾駟爾轄矣

六轡既張四牡彭彭叶勿柑勿綱式駮式襄和鈴

瑒瑒鸞旂是皇孔揚我烈光

天高高

天高高思也

天高高烟迢迢不見子都見黃蒿
舟鷺鷥乎子都渡乎

我祖

我祖哀離也

我祖夫東零雨其發之我望子嗟昊天其濶之
旒翩翩兮惚兮旋兮弗閱我瘖兮孰與子言兮
揚之流有鱗有鯉亦有麇鹿撲朔是邇叔兮伯兮

曷莫我以

河水

河水慟逝也

河水瀾瀾鯉魚搖尾腹中生骨女不得活

驚

驚閔忸也

驚驚烈烈飛光出血

捷之吒之翁敖夫眈憊之

天門開

天門開迓晃朗青模糊披黠黠軒雲車潢之浹天
之衢五城樓蒼蒼浮疾電迸繞飛精匝流雷公播
鼓夔魑伏壘八神殷麟巡游云雲爛彩陽輪曜丹
精芒放悲鑿城爍闌扶乘璧魄凌輶而奔掣翡翠
火齊激射生青烟銀臺璇闕不可殫狀凝焱鏤霧
天鷄四唱天鷄唱天樞移中有巨人旋轉巨磨無
已時金鷄翔玉兔馳星纍纍繫以持銀浦滙沆瀣
之潤下潤萬族氓安之天帝大笑天鼓隨開天門
伏天庭天帝坐琉璃之仙楹衆嬖夾侍進止不敢

停帝廼詔青陽朱明西顛元冥青陽朱明西顛元
冥稽首闕下維帝言是聽帝錫之柄福萬生弗愆
于于度庸廼成皇慶廼成羞芳馨神功歲歲休羣
蒸惠恩祐庥明德承

練時日

練時日撰吉良驚幽極凝明陽奏震肅延忽荒霄
爾豁靈之旂蕩蕩下晻藹浮凌駭茲紆日修靈之
車風爲輪揚燎燭炎軒軒觸若雷明朱暎淡偃蹇
天之門靈之下衝玉戶絢若流躡風馬稍閭閭澹

煙舉靈之來且冥冥睇况構爛爛騰般陸離閎崢
嶸靈之至憺將愉森拂汨莫莫趨曳流景艷朗舒
靈已坐衆響集疏安和鬯竽瑟蕪艾納蒸初暘紛
哉陳羅玉堂鬱芬苐蹇樂康靈安畱神哉娛流宛
延颺辛楣窈窕進被穀羅凝瓠犀蹙微歌珮琤曼
交珠珂衆慮齊神聽和菹桂蘭奠椒漿厲精魄延
帝閭怙恩明台靈望隆肸蠶鴻無疆

惟泰元

惟泰元媪神孕物育民表日納月協陞撰辰元苞

內胎奔精四巡蟄蟲蓋冬植物動春公冥青陽一
終一始陰陽雨雪旣候旣軌百穀土木咸若厥理
迺活百生百生滋喜於皇孝德崇命溯祖爰絜我
牲載滌我俎靈旃庶旄金支樹羽構神彙精儀殫
音舉聿馮聿式篤神之祐於昭明堂於鑠斯皇伏
蠻蹠狄僕戎隸羌幽崖朱垠我化爾昌天子之光
天地之慶

獻歲發

獻歲發回青陽天公公星爛芒開天門東蒼蒼般

裔裔雲承陽修龍偃蹇霞麗章羣仙謁帝排天閭
雲霓晦藹青鸞翔龍旂蜷局紆而長玉軼登陟鈴
央央瓊玲琅玕鏗鳴鏘東面西面維乃方將入門
候有望披紫煙棲紫房鳴玉鞭陽燦光紛容與忱
肅將蹇將進尊吾行歆浮雲熏都梁奕萬舞綏無
疆鼓簡簡鐘隍隍竽瑟陳交笙簧疏緩節靈焱颺
頽首跪拜于堂于錫帝錫之福遐而昌時日祭獻
百神樂康河嶽山瀆皆如平常盛滋枯槁降雨露
雪霜跋喙飛走咻咻攘攘雷公電帥驅百姓百殃

百姓歡喜各各飲食衣裳孫子耕作婦養蠶種桑
四夷見之讐服來我將我王丞相太子皆一時善
良 皇帝萬歲 臣 無慨慷

天馬

天馬况殷燭維驚流景炎光馳躡東道精爛垂招
靈氛倏而下騰蒸蒸澹流赭埃微颺淡淡吹城闕
浮歛以逝厯弗毛依有德帝所貺靈貢職刷彼極
馴吾閑紛佳哉漢萬年神冥冥昇秘府斫玉禾甘
華黍軒子姿壽終古壽終古馳天閭駮赤龍邀玉

堂

聖人出

聖人出入絃治擴明堂朝四彝陽谷東昧谷西南
朱疆北幽崖戍龜茲縛月支休屠北單于大懼各
遣子入侍襜褕辨髮委蛇大將軍暨各都護出入
禁衛刀劔無復持蒐班麟羅紫芝渡瓊圃浚玉池
撰秘檢恢壇墀故基歲二月至于岱宗休哉垂雲
油油靈氛彌海日出員嶠移忱迢迢神應之皇帝
陛下壽無算于胥樂兮千年斯

思悲翁

思悲翁搖搖乎奚持浚谷駭焱哀以悽蒼龍遨于
穹安知毒螭鳳皇翱翔迺弗忘梟與鴟嗟嗟鴻鵠
遐哉離思悲翁乎安之

翁離

翁離趾中天之宮上見飛仙乘白龍或南而北或
西而東雲房絳闕迷安窮上邪安得騎長虹翁離
趾中

雉子班

雉子班女胡止邪離哉翰水有茄河有魚以盤桓
何來虎賁郎張弓囊金丸雉子躑躅蜚不及樹號
田閒阿母心悲飛鳴日上下行當結巢南山阿南
山有毒蛇噬雛吞卵厲吻磨牙不如埜雀游婆娑
野雀聞之大慟子朝敖于田暮弗入窠

戰城南

戰城南悲風吹吹黃沙沙沙仰飛仰不見天猝勿辨
女與台風吹刀鏃班吾遺左徒倒戈右徒棄兵棄
兵倒戈者有生歸告大將大將怒女鬪死損我聲

連師夜動虜驚晝馳歸營舉爵甲衆嬉嬉張鎧擊
劔夜雲四開各各歡喜生來歸我思來歸來歸安
可得願爲鬼雄鬼雄安可圖狐狸嘜血老鴉啄軀
白日晚下游魂夜呼

有所思

有所思所思不見傷我情夜不見月晨出星我在
大海南君在大海北君無他心誰告我女憶我欲
告女告女安可得夜臥牖戶日臨高臺飛雲四下
風吹開喜鵲下來爲我媒歸來啟覆紙盡見書君

不我顧曷多躊躇躊躇不可絕我將擲書山陵高
高夏無雪噫吁嘻悲吾孳白日出沒悲風噓高高
在土收中吾

王子喬

王子喬身騎玄鶴何離披忽翔而翥東而西建章
浮雲胡參差游氛滅沒人是非長招搖紫極升天
梯升天梯排九閭招玉女謁軒轅西王母翩躚而
獻壽賜以靈藥酒脯榮精魂乃嬉游十洲歷弱水
袖拂若木騰飛烟迴睇七星如卵而上下玉杓橫

亘如冰絃如冰絃俯帝庭天子垂衣開仙楹惠林
海寓臻和平神光夜見太時碧鷄寶鼎精蔚騰更
治壇受籙登封泰岱觀日出滄溟仙人大樂吹玉
笙羣臣拜手上壽聽鳳皇和鳴

雉朝飛

雉朝飛其羽灼灼雌前跳子後躍于田于薄是飲
是啄我弗如爾行樂爾樂我哀朝行出游歲暮獨
歸獨歸兮心悲羣嗷嗷兮夜饑我無術兮哺兒先
我死者知之

飲馬長城窟行

飲馬長城窟城穴堆白骨白骨爲人時雙鞬奪馬
騎一解騎馬過城下飲馬臨城壕堅冰凝澁瀾朔氣
鳴弓刀二解枕戈臥沙場星芒動寒陸青燐黯不流
枯骸望城哭三解

大牆上蒿行

牆上蒿長于人我高不及牆曷得如女長出頭豈
不好嗟嗟露與霜憔悴先百草

猛虎行

猛虎睚睚眦眦前導俛後跳狐夜游吾墟攫我羊
我豬攫我豬我羊來食我場我將磨刀刺其腹聲
鏗鏗風簸簸猛虎聞之來觸我屋歸告山神詈予
不好山神瞑神當命虎晝巡俛鬼逐逐狐狸嘻嘻
李將軍來猛虎不知

車遙遙篇

車遙遙遙入煙霧馬不肯停車不肯住一解觸石
折軸車輪無聲白日欲落風吹馬鳴二解遠憶送者
此時到家君意已息我勞如何三解食瓜遇苦食梅

遇酸采薇苦饑負薪苦寒

四解

陟彼沮喁我心如荼

空林有聲恐非令塗

五解

道逢游子將別匆匆出門

入門殊與我同

六解

短歌行

對酒當歌無聲奈何匪歌之難予心之酸門外馬
鳴門內聲吞瞠目一笑裏糧出門野宿于郊星芒
夜寒雞鳴月下零落可憐長風驟動木葉蕭蕭拔
刃四顧壯心頓高虎猛食人不擇醜好烈士感懷
不必衰老木栽廼生人樂廼壽何以忘憂載飲我

酒

野田黃雀行

黃雀飛飛上天下見黍稷多野田我飛下田羣雀
鬧衆紛鬥爭飛亂叫叫醒老翁羣雀四飛老翁罵
我食人食爾食我食食我力呼兒逐我繞我前不
知我有雙玉環行當張羅唯爾殘罵我尚可勿羅
羅我羣雀四飛飛入窠老翁有羅如彼何

今夕行

今夕飲酒樂歌坐愁怫鬱徒吁嗟今夕不行樂明

日明年今年當如何一解蒼鷹長出巢南北東西飛

天馬西極來顧影驕鳴嘶二解野有死麕庭鳥聲悲

我見故儔我心則夷三解小車軋軋大車磷磷車輪

暗轉不見後人四解棠棣之華翩翩匪君之故

胡爲長歎五解仙人洪崖手和藥丹謂子不樂舒袖

納丸六解我有旨酒以娛我賓皆當喜歡以酬令辰

七解

采葛篇

采葛思葉長摘瓜思味甜出門無所得不如歸種

田一解種田一何好田家一何勞雨多壞我稼雨少

枯我苗二解白馬張兩弓馳驟風生弦翻身斃走兔

一羽雙禽連三解俠少逢狹繁邪音襍兩廡流連盼

三婦安坐樂未央四解蒼鷹啣肉飛側目尋故巢抖

毛樂千尺歸來哺嗷嗷五解低頭思故鄉易思復難

忘離獸西北馳倦鳥東南翔

鰕鮠篇

鰕鮠在泥不知龍騰微禽入海亦有化生蘭蓀被
墀行踐其芳自居下流於人何傷驂騑伏皂悲鳴

向風世無長塗與驚駘同朝過秦岱羣罔閉之我
不在高焉知女卑霜淨草白秋高天開鷺鳥獨上
浮雲下來東出咸陽獨登古原落日千里孤懷萬
年

獨漉篇

獨漉獨漉水清亦濁清濁由我爾無一可有華者
荷在彼中池爾豈不芳我無可貽江鷗晝飛亦好
其羽我匪無弦念爾無侶貪狼攫人掉尾伺行回
頭一笑無心彼驚羣盜入室四顧挪揄適從何來

不知我無寶劍出匣當夜作聲斫禾飼駒明日遠
行

短兵篇

長戈盪決不如短兵急呼親戚不如友生彈我瑤
瑟拂彼綿絲音聲雝雝我當好之我心如環憂不
可絕朝興夜眠轉喉卷舌狐狸拜月卻略似人彼
無其具吾胡以親財渴于淵見者歡喜我家固貧
爾亦不起奴子盜金行步戰身我原不知虛心畏
人

鳴雁行

鳴雁鳴雁飛莫入雲漢雲漢罡風吹無時昨見雕
上不下來高堂迤邐懸空絲高高在上風吹之乃
雕所化今無依今無依兮可奈何風霜雨雪如君
何

善哉行

展我瑤席彈彼玉琴協作澹志飲酒樂忱一解明月
在座清風動枝伊人迢迢予時念之二解皓彼白鶴
翺翺素雲日暮獨下來懽所親三解僊人洪崖乘鸞

步虛當風下願爲子躊躇四解 鎔金鑄形肖貌失心
面目良好我思弗存五解 高雲千代流水萬春氣息
色故人逝物新六解

哀歌行

誼者勿誼歌者勿歌嗚虘我哀奈何奈何父知兒
寒母知兒饑我無父母饑寒誰知親在憶親孤兒
戀墳魂斷屢屢昔草荒更新離杯夜停兄右弟左亦
無人憐哀哉生我抱女置膝忍涕中悲兒亦無母
我懷痛之燭短夜寒予心之酸擡頭低頭男兒可

憐

縛雞行

老翁縛雞雞亂越羣雞亂飛上屋叫老公布粒兒
童把籬羣雞下來身不可知黃鵠歸故鄉鶴子飛
上天我無好羽翼何以能飛翻老姆詈予申申飲
啄擾我人微蟲之故焉縛女身麻雀顧我來躍我
前西隣雞上高樹巔顧我亦何益爾非俠少年膳
夫作羹庖人磨刀霍霍向誰目動心搖老公縛向
市上鬻雀上檐雞下屋道旁之狗空餽餽

榆臺行

朝登榆臺暮登榆臺榆臺高高胡天開天四垂風
倒吹牛羊日暮聲大來軍中甲士歌胡歌胡人坐
地吹胡笳胡笳聲悲胡歌聲苦吹笳胡人淚如雨
壯士拔刀夜中舞夜中舞悲向天健馬死塗人死
邊生當報天子沒當血食魂夜旋

企喻歌

騎馬騎快馬使刀使快刀一馳百里過一決千夫
逃 鷓子經天飛黃羊竄黃鼐有錢生風雲無錢

莫擡頭 朝出黑水道火伴如威好暮向長城宿
火伴勝骨肉 我跨綠螭控弦殪兩狼女戴鐵
鉅鉾跣跋生輝光 聞說單于來歇馬青海西不
愁人不多但愁心不齊

步出夏門行

月中有桂樹天上種白榆但在顏色好不在顏色
殊飛燕棲雕梁紫鳳巢天居隨意得自足爲樂各
有餘倚門誰家子容態良復姝頭上墮馬髻耳邊
明月珠纖纖節行步拂拂流飈俱見客稍卻畧進

止顏愉愉遜客入西閣當風開廣除問客何自來
笑言聊脚踏亦復非脚踏檢束意自紆念客遊遠
方爲客傾玉壺左手把巨卮右手擎華祛奉卮略
下拜欠伸何徐徐客飲復跪受然後安其軀呼奴
作羹飯促辦在斯須斯須亦不惡金盤雙鯉魚食
畢敬送客斫禾飼客駒火伴三四人皆言此婦無
徒云貯金屋此婦誰得如

煌煌京洛行

京洛何煌煌風雨會八方其陽峙伊闕其陰負北

齊短步卻畧儀度周向晚出明光走馬過長楸甲
第朝霧接崇闕飛雲浮晨入許史座暮與金張儔
開筵挾親故燈火繁層樓中婦抱錦瑟小婦彈箜
篵目眩作使麗耳飮河西謳左手持巨爵右手探
藏鬪梟呼接牛飲醉饜酣駒駒時與歡者狎未識
生人憂艷彼桃李華樂此歲欲道東隣馮敬通夜
哭聲啾啾

西澗赴山將往雲罩憇天香禪刹

天雞叫海日晴翠濃諸峯丹崖媚朝霧了了青芙

容尋蹊背初旭入谷聞驚風半嶺生飛煙忽沒巖
罅松仰睇辨蓮宇稍見僧樓紅流雲布羣壑清梵
生虛空天影入秋澗清暉閑與同石逕去不極前
路誰能窮鈎索得懸解妙寄饒歸宗跣趺憇蓮社
歎息懷支公

由天香行藥西盤初入山口

巖秀澄孤懷趣塗意先往理策遵迴蹊空林得樵
響幽惊眷岑寂矧茲秋日爽霜徑稍曲盤虛翠忽
晃朗漸歷紆巒深未識迴塗廣孤暉隨趣濃懸磴

披烟上杳藹接諸天振衣發長想王裴不可作邱
壑誰心賞何時飯名僧松檐稅塵鞅甘從麋鹿游
拂衣謝親黨

天成寺

秋氣寒空山樹石忽清峭採藥耽翠微欣逐雲門
調叢薄稍蒙密及此初日照鳴淙石罅涼欹徑雲
閒蹈詰屈周櫛參捫攀辨蘿葛偶厯開士居忽證
前蹤妙霽壑明山楹迴梁灑飛瀑向背辨明晦豁
達縱臨眺百里際檐隙雲物相輝曜山煙自晨夕

流覽蘊深悼緬懷田子春當風蹙微嘯

薄暮至萬松寺

山翠昏陰崖雲際聞孤磬怖鴿驚深叢枯筇響蘿
逕松關晚森肅荷衣拂深淨日落山風吹琴筑灑
清聽不見湯惠休秋巖發高詠曳屐循道門簷閒
數峯暝

曉入東巖往千像寺

幽尋意不極披衣狗所務山曉巖氣白振策得微
路肅肅青松林濺濺石流渡零露晨未晞青草濕

芒屨曲折入空翠
霜徑屢回度烟巒
紛若積迴塗
眇非故髣髴
聞鐘魚香巖
澹寒霧

晾甲石歌

褒公鄂公沙數恆
昭陵玉馬嘶魚鐙
咸陽鑿地古
戈出當年白氣光
如繩虬髯公子厲
長劍驅除六合歸
澄清吐蕃突厥置
亭障受降遠樹輪
臺旌盧龍螭螭靖
邊塞裏甲東作玄
菟征營州都督尙
矍鑠提師夜跨東
溟鯨峩舸大艣汎
鳴綠滄海魚眼紅
千層扶餘晝拔躡
松漠樂浪圖籍歸
咸京鮫皮

犀甲帶蜃氣金鱗倒射漁陽頽歸休桃林放牛馬
懸崖巨壁爭飛騰當風長嘯脫重鎧刀芒箭鏃生
光晶東甘絕磴亘積鐵熊羆百尺蹲峻嶒綠沉金
鑱漬蒼黝陰崖白晝蚩尤蒸高王瞬息遞淪喪雲
煙過眼驅霜蠅東丹崇樓亦煨燼嗟女頭骨胡獐
猙礪角近資殼鯨肉敲光遠趁龍鍾僧朔風大作
海日動血光疑帶蛟涎腥石壇叢杏舞松漠百萬
甲
啼飛燄石門十月灤河冰陵屯谷藉寒光增
西望潼關見落日鬱葱無復瞻春陵塚起邠連葬

白骨雕戈大羽纏枯籐招魂不到巖下石森陰似
有愁雲凝纓滕綴組弗知處松毛石髮空鬢髻毋
乃夔魑奉神守斷趺不許穿金縷我欲排天眺平
壤霜高大漠聞呼鷹作歌摩崖泣山鬼昏巖夜聽
雷掘轟

登舞劔臺展眺作歌

天門匹練馳吳關之罟塵起迷堯公白衣蒼狗鷲
寥廓變滅任作兜羅綿黃羊蘆酒不成醉手揮落
日窺窮邊漁陽八月沙草白穹廬蓋野悲風酸烏

鳶塌翅楓柏落萬竈不動貌貅煙屠庸樓櫓靜巖
戍烽清敕勒銷紅鋌薊門畫角連秋塞空巖日暮
驚羊鞭眼底不遇十八子干霄白氣勞衝旋銅柯
離立飽塵劫騰擲應見青蛇盤文登將軍復塵土
玄戈駁蝕仙人壇科喬叫猿舞猿鶴電光彷彿蛟
虬纏岑寂荒臺塞榛莽孤蓬坐振驚沙翻蒼茫俯
視但一氣青氛白霧沉虞淵生不能如寶車騎策
動雞鹿銘燕然日南銅柱便須到朱旗赤纛揚戈
船不然衝雪圍天山烏號白羽持中權蒼鷹下鞬

飛隼滅擊獐飲血吞生肩安能彈缺作游戲沾濡
底事爭蝸涎緹帷潛伏困株守啄息無乃譏雌蟬
北平礪鏃尋李廣來射猛虎田盤巔

出郭見西山晴雪有懷謝青柯

夕籟喧叢蔞蕭堂昨夜寒朝暉上西崦雪在青林
端此日跨驢客梅花誰共看一瓢勞遠意落葉浩
漫漫

甕山

谷口白煙合隔林聞打鐘樵蹤不可拾磴磴濕雲

濃人立一山雪鳥鳴千澗松僧房好閒坐不爲學
降龍

冬日觀象臺二首

木落風高畫角哀霜濃野澗一登臺雲旗天轉桑
乾出日馭煙橫碣石開黑水遐封思禹蹟金方借
箸失邊才漢家養士恩如海誰伏青蒲請劍來
嚴飈吹雪滿西山原野蒼茫積素閒鉦鼓一軍勞
輓粟風沙十月憶當關重闔日落銅符出大漠雲
驅塞馬還驃騎貳師俱寂寞短衣擬綴羽林班

冰嬉行

陰終暑促寒剝膚黃沙白浪颺吞屠鵝毛墮地澤
腹裂玉樓凍合彭咸居瀛洲宮闕眩銀流琉璃繞
城冰鑿除朔方健兒不斲冢曾冰措趾真壯夫虎
韉花帽好軀幹襦褌繡錯貂襜褕攀旗不跨汗血
馬捷足逕鬪翻風鳧太液虹梁望不極虎步直入
滄波塗咄嗟此術非怪迂或十或五來舒舒鵲鵝
魚麗隊不拘雲頭一瞥投虛無紛拏朱鷺喧提桴
便旋忽作拳其跌如駑發機風吹葶逕從溟洱窺

大谷山堂集

卷一

三

娥隅嬉虞淵迴日未晡御風倒眎烏畢逋珠宮晝
啟中建旗曲旃颯纏垂魚鬚琴麗燭飈縈紆擊
冰夷鼓鮫人趨虎賁驃騎烝其徒分明畫郢周六
區期門暈的懸火珠張茅設蒨申三驅望洋嶽立
軒厥軀聯翩彷彿翻雲車馳突不假朋儕扶截流
倒發金僕姑左射右射矢注壺毬場千步瓊瑤鋪
一擊勝負爭梟盧離披五色天葩敷壯哉非虎亦
非驅草頭不數桃花駒瀚海三日行有餘龍庭老
上猶生胡好插大箭關雕弧踏濤北去追風烏長

繩生繫南單于

大谷山堂集卷一

大谷山堂集卷二

謝山夢 麟文子

送友人從軍

黃風捲石劈空墮赤底冰橋軟如簌花裙蠻奴行
逐鬼虎毛壯士山腰坐毒瘴衝關鶴倒飛健兒殺
賊懦輓馱么膺曷足撻天威丞相秉鉞西出師雕
戈半募雨林籍金甲盡耀關中兒霜曜低空肅刁
斗掀騰何待終朝虓地中鼓角動熒道天邊日月
迴珠旗巨石壓卵鼈在甕豺狗那可當熊貔女未

三十軀體壯猛壓千夫不相讓雕弧羽箭虎皮鞞
鑿褫驕嘶氣雄宕盤馬寒天迴烈風兒女霑襟不
敢向半月應過蠶叢國壞雲塞空石裂壁風動刀
環虎豹嗥指落狐裘硬如鐵虜策當天日暮吹馬
蹋堅冰眼流血霧轉旌竿夜斫營霜沈大鼓朝迎
賊須臾烟起東方高飛礮擊碎蠻天稠虜酋逃匿
馳飛猱白日無光風怒號萬人呼洶天爲驕女時
披甲揮短刀刀飛如雪人如蒿猩紅血染團花袍
蹂躪壁壘攻其巢擒王勒馬眼如炬大旗獵獵風

颺颺嗚呼丈夫壯不報國空跌挫那得兒女手中
日堅臥女歸縱不佩印如斗大十萬烏蠻膽應破
飛觴過馬君當賀

平則門外觀征蠻師出二首

日出大旗高霜騰萬馬豪雷霆朝伏壘鼓角晝鳴
刀邊微懷明主艱虞賴爾曹誅鯨知不遠好憶

聖心勞

廟算軒轅帝天兵虎豹羣父兄惟僕射功罪仰將
軍陣轉蠻雲黑關開峒壁曠擒王兼射馬衛霍待

銘勲

平金川詩

於清世厥聖今 皇帝聖禹維泰元媪神擴覆幬
畀子巨扶桑崦嵫胥我庭我戶蠻彝國干入或梯
梯艴艴蠕蠕迄鄯善厥種不可數以時至稽首其
孰不予拒歲疆圉單闕盜起于蜀土厥地曰金川
實溪峒之虜狐狸騷其羣狡兔竄榛莽纏頭裹紅
帕負嵎擊銅鼓昏中嘯于梁譁譁而嘖嘖薄擾茲
疆土薄驚此士女蟻蚋怒奮臂狂兇突奔沮豈無

貌貅衆壹發殪其五維 皇帝曰嘻彼譬彼穴鼠
消蹤匿陽晝乘夜盜倉庾苟莫或猖獗其亦足以
拊聿命女廣泗移節泣厥宇鞭箠暨撻伐惟爾置
爾處廣泗夙經歷滇黔莫敢拒謂曰茲么膺旦夕
唾手取頓首拜新命踰月抵其部茲土闢蠶叢亂
山作區藪石棧紛鈎稜攢槩互船鈕笈箒晝曠黑
鳥道錯指拇前趾壓後頂十步蹶其九出沒雜狻
狻千百跳羣醜堅礪蠹千尺飛鏃不及首彼弗敢
蹂躪我實憊趨走蒼黃歷歲月迺致事不舉 帝

命故相親女往視師旅將帥嫉鍾鄧指麾困齟齬
債事養寇賊厥罪不可怙連繩就刑戮脰頸挫刀
斧執徐月在陽 皇帝赫斯怒曰天帝祖宗余一
人是祐維羗氏蠻彝余一人是主彼小醜弗讐余
胡創厥巨顧恆曰女來惟女克余輔假女節其往
旌鉞賜左右維刑賞黜陟勲而勲而咎庸對揚余
休勒女績鐘卣撰辰命太史月吉日維午圓邱告
大帝于郊用元牡警蹕潔盥祓飛文燭鹵簿扶棗
耀珠輪蚩尤擁奔扈微道紛星羅揚燎爚簋簠百

樂轟周壇鏗磬筦祝啟燔柴肅登告薦元纁璣組
皇帝袞冕立拜跪罄仰俯研精合幽漠元靈鑒
稷黍高煙噓呵升靈旂詆蕩下霄光澹瑩澈萬景
森帖妥渺 帝衷是格羗我祐我嘏聿朝獻于廟
以告我 皇祖讀祝敕奉常曰孝孫臣某維列聖
是何以有此九有肩承受圖籙兢業一寒暑彼有
苗弗格敢昭告用討凝忱奏震肅蕃釐蒸戶牖祭
畢 帝遣送展斧立當亾臣恆頓首謝捧矢出馭
娑卿尹百執事 帝命餞之墅聯翩獻樽學周迴

列鼎俎進止鳴衝牙矩步叶魚雅是日大雪霽嚴
飈淨千晦驍騎數十萬騰裝俟已久按屯周八區
列校相結糾龍盾閒虎鞞殷鮮簇繡黼酸風吹大
旗爛爛揚烈火旄幟翻青紅琴麗動樓櫓檣槍遮
重闔天弧挂朝旰虹蜺屬高纓陽輪爲之仁朱甲
炬流電晴郊惑瞻覩士厲怒不喋馬踏裂平野鮮
扁隘宇宙山谷互吞吐維時虜乘墉得計恃嵬峩
蠻江名赤底長橋懸鐵鎖一人扼其要萬夫困柯
問松林藹巨棧纍石斷厥左飛鳥弗得度自固亦

足頗飲酒吹笙竽休息嬉伴夥天兵破空下勢若
山壓卵黑夜摧崑崙賊險不遑守抽刀斷柞械捷
足躡岡阜雲梯奏奇績攀登奮擊掎巨礮掀層穹
斷石積杵白山巖震崩豁兵氣厲振擻礮卡倏碎
裂顛墜接肩肘血肉雜管蒯肢體資踐蹂完骨裹
層崖殘骸懸枯樹騰焰烈巢穴焦爛到雞狗 皇
威振蠻徼茲戰實云首策勦集武帳獲厥婦曰扣
扣罪維渠魁陰謀鈎黨羽部落揚羶腥漢姦隨指
嗾曰此不可生斬之懾其侶斷首懸期門虜見盡

惺蠱或喙息于竇或潛喘于岫昏叢入荆棘夜伏
驚飛弩移師括溪洞采入薄其阻搜剔極幽隘捕
捉磬童乳逆虜聚族泣啁嗽汗如寫倉卒匿弗獲
譬之魚在釜復如羝觸藩退遂兩無所悲號乞生
命匍匐詣軍府女厲女弓矢女結女心膂女盜我
巖穴女騷我安堵不于女是刑而于女是撫虜復
懼奔竄淚下不可禦旋沒爾室家旋覆爾保聚維
皇帝曰於彼亦足惻楚緊絕界不隣咸吾胞吾
與旣震驚厥志其曷靳彼許獫獯吠天日殺之亦

奚補入死出之生女恆歸弼我恆拜手受命嚴曉
降幡豎殷雷動角吹高原列弓弩旌幢風拂翻鋌
戟晝鳴吼飛霜靜大漠刀鋒豁撐拄萬帳寂不譁
森嚴肅刁斗大鼓撾衙門元帥坐當廡諸將裹甲
入夾侍嚴比偶羽林何戈立于隊怒虓虎逆虜繫
頸至欲進足復跂叩頭淚墮地俛首不敢嚙臣恆
曰 皇帝于女若高厚維 皇帝盡義義盡以禦
侮女我臣我僕迺亢我父母女大刑是干孥戮女
自取維 皇帝至仁仁至乃活女旣革女呼吸旋

憫女噢咻弗斬女種類迺靖我邊圉豈弗克女誅
以覺我鐘虞逆虜感垂涕罷泣起蹈舞願世世奴
隸奔走罔或後南人敢復反于 皇帝是負此時
春宇和觀者集童婦謂億載萬年邊徼絕氛垢我
而食而飲彼或羣或友維 皇帝大聖聿寧我了
口士馬盡騰奮農氓各歡歐是日金川平月卯日
之丑 皇帝曰歸來女豈噲等伍頒爵首五位錫
金章紫綬將帥剖符竹盍簪躋華膺酬庸暨偏裨
載績樹螭紐無疆女惟休世伯叔甥舅發粟恤孤

寡賜租賑貧窶闔澤浹存沒八埏樂洋溥永銷彼
戈鋌用事我場圃繫諸臣之庸迺 皇帝之武
皇帝曰不然實我 祖我 父維 聖祖如天
皇帝纘厥緒孰勿王勿庭曰暘暘雨雨維 世宗
大烈 皇帝皇其序援天戈以麾聿難彼海鹵示
弗騫弗崩屢多黍多稌其敢不我懼以就我規矩
戎狄遠如期于元日拜手祝 皇帝萬年奉 皇
太后壽與天地久長樂康遍童耆何數夫淮夷揚
挖誌韓柳作詩記大事銘勒壽弗朽

方名上卷
卷二
從謁

景陵

陵闕肅重闈嚴局虎豹蹲八神昏警蹕石馬夜臨
軒天地深恩在蒼生痛哭存吞聲萬行淚臣本老
奴孫

桃花寺

丹嶂青梯倚夕曛冠山絳闕麗層氛虹梁倒飲盧
龍雨石壁晴翻大海雲天入古潭懸玉乳人歸萬
帳動星文時清無事吹霜角落日雄關散馬羣

馬上望盤山

積氣盤空曙色開
丹屏翠蓋鬱崔嵬
龍歸霧失東
甘澗風起雷奔舞
劔臺半嶺白封雲
似帶上方壘
點海如杯懸知絕頂
閉關客目極干旛
拂地來

石鼓歌

蒼精墮地馳雄虹
石鯨劫火陳倉紅
呼朱老公市
霜杵八神失伍天
無功元黃血漉龍
戰野金僊雪
涕辭新豐鄒嶧燎
原鼎沈泗神光一
氣追黃鴻
宣和鏤金臥荆棘
大車瓊裹馳飛蓬
魄隱層氛辨冰

闕霧濃濛次驅豐隆道園老子不可見油雲覆宇
光熊熊憶昔徐鹵厲鉞刃桑榆重覩陽輪中陵邊
止阼奕彤矢鹵車簽勒旂岐封陟山絡野取獬蜀
麤騎大空筇鹵弓獸鹿如象驅如虎迎禽叢雉羅
疑置金鉦按節君子樂多賢台邇皆如龍旋凱饒
歌斐進獻永變天子眞英雄五瑞式輯萬邦賀元
正大啟東都宮邀車邀馬句典重皇哉帝禹都俞
同大書深泐壽天地非罇非飼非符銅削跡雍涼
歷幽汴蓬山幾閱沙塵蒙仙鸞舞空鳳皇下怒龍

拔地青螭從蚯蚓聯行綴跟肘金薤垂葉交玲瓏
刀稜雷楔厲圭角斧鑿滅沒天人工修地斷劔勢
凌厲神夔裏霧姿拏空倉頡授簡女媧哭盟門碣
石慚兒童漏痕昏翳壁角滴折股碧綴釵頭蟲金
繩壁紐謝繁飾紅鵝野鷺嗟苓通熏祓無事誦萬
遍星幢玉節迴朝矇退之東坡不更事帝鈞那許
開心聾趨趨篋篋箚箚口叫闔誰獲隤天聰琴麗
戟門動靈怪丹書綠字光橫縱羣靈下觀芝蓋集
四牡髣髴來龐龐申甫鵠立聳冠帶淮夷羅拜趨

徑何恍惚明堂列圭鹵衝牙劍佩鳴琤璫尼父東
周夢元聖斧柯弗救東山窮天王不狩韋編絕壯
猷遐溯悲瑱胷乾綱凌替列邦沸咄嗟方召何由
逢安得桐魚肆扣擊奏公遠趁蒲牢鐘天聲鏗鉤
塞宇宙驅除六合無姦凶罟罟綺散墮金碧橋門
鼉鼓昏逢逢

出郭將赴西山道中作

馬曹笏挂頰記室娛清暉自成曠無揀夢與孤雲
依滌塵慊豐暇挈榼提青絲下澤緣高粱沿翫青

玻璃辭囂意乍豁矚岫枕更移暖樹喧嘉禽故柳
生新稊節往脊屢逝佛鬱嗟非宜水雲澹交照巒
靄浮修萸目延念屢觸感至理弗違逝當躡圓頂
藜杖凌青梯

畏吾村

李茶陵墓
在其地

游蜂喧暖晴春心澹方午沙草延青驢林迴辨村
墅名藍敞金碧皇姑寺暄陽動高楚嘉樹翻紅牆九
子遙聞語扣馬懷優婆比邱漫千古惻悵子規嘯
晚蘭憶湘浦

蚤赴翠微寺

抱琴投空山晞髮入寒澗
碕岸融春漸客至鳥驚
散閒隨負苓子忽覲朱樓半蒼蒼
巖霧合靄靄翠
痕亂倚杖聞霜鐘僧寮就朝飯

祕魔崖

望望尸陀林蒼蒼浩雲樹
亂石雜菅蒯披榛躡樵
路石徑投荒寒趣塗辨回互
苔花滿蘭若滑蹋乏
安步山翠昏禪扉濃陰自晨暮
古壁嵌虛空開豁
勢餘怒荒忽兩龍子澄潭起層霧
絕磴青松蟠飛

鳥孤雲遇念彼跏趺人誅茅定何處澹照沈山楹
鐘梵虛巖住

祕魔崖月夜

空山生雪霜涼月下梧竹稍轉南巖均照見東牆
曲鴨脚涵空蘋風樞澹寒綠梵響林逾寂遙應前
峯瀑空色澄須彌懷抱轉幽獨無言契明鏡來就
盧師宿

朝往香山山

夢覺鐘魚清寒裳月在棟盥濯辭精廬山僧出林

送苔光上芒屨昨宵知露重亂泉聽乍失溪澗澀
餘凍石骨生清寒行吟抱朝甕日出照幽谷山鳥
發新哢微風被空翠流雲散巖洞永懷煨芋者隔
岫聞清誦

東郭汎舟遊眺王氏林墅

春水蘸新綠春空如熨羅蘭橈浮玉浪白鳥映青
波草滿鬪雞道鶯飛布繡坡因思海陵客腸斷榜
人歌

畧句通雕戶連錢起素鷗晴絲交蜨蝶碧篠亂鈎

轉煙暖桃花渡春濃燕子樓景光憐上巳眺矚迥
關愁

十洲畫浣紗圖

雲藍簇空鋪碧紗溫風擘柳噓晴葩修眉浮春滴
暄翠魚鱗渙起青浮瓜苧蘿病月美風日花鬚蝶
翅紛周遮玉環泱泱漾錦石碎金搖盪澄挨沙熏
人蛾綠若醲醴妍暉著面勻輕霞苔磯拂水淨于
拭但無高士浮仙槎西村靜女美不嫁鬢蟬濃黛
塗雙鴉亂頭麤服好風致水梭坐翫空中花越溪

蓬材截青玉柔荑穩握疑魚叉冰紈白紵勝蟬翼
霜光儼共瑤波賒游絲彷彿罨倭髻衣香暖放黃
蜂衙軟風弄枝小紅亂斷香零粉相橫斜有時縈
颺拂瑤碧風鬟霧縠交髟髻依人嫩綠動清暎目
成恍逐春鴻遐丹鉛著意學春態枝頭便擬呼澤
家鴟夷絲絡流金駟綠珠十斛隨香車好將朱粉
數朝華梧宮桂館迎仙娃玉牀著膚瑩不瑕歸來
好向東隣誇

天閑驃騎歌

風沙獵獵花門湧肉驥礮礮蘭筋聳才大姿雄動
有神牽出銅墀氣森竦騰聲遠踏流沙煙深夜降
精雷雨懸列缺無光霹靂動真龍拉沓生空天青
海蕃奴不敢控蒲桃遠效哀牢貢未施羈勒霜蹄
翻蹴空不待交河凍但覺揮戈大漠馳誰知踣鐵
連乾動浮雲颯颯風颺颺山崩谷湧馳奔濤渥注
萬里一乘輿中天突兀方瞳高天子宴坐含風殿
翠網輝分九華扇夾鏡雙懸天骨張蹴踏瑤階日
光變翹首長鳴電彩迴至尊動色太僕羨錦牋羅

帕輕雲蒙鏤膺繡簇珊瑚紅作態懷恩自驕愛殿
前徐步何雍容當時十萬沙苑馬格鬪掀騰不肯
下當槽頗厭爭芻喧短筆時被圍人打此馬入門
始一顧萬匹吞聲就聾症前年大狩飛廉東廡麀
羹兔無畱蹤至尊玉轡山棗弓鑿蹄翦鬣高纏駮
此時朔漠來真龍馳突大澤毛羣空倒射黃羊殪
其五血飛漉漉迴腥風金鞍翠節被來好龍芻餐
遍天山草殿閣爭圖玉鼻駢騰騫漫憶橫門道君
不見霜郊瘦馬如堵牆東門日出看騰驥天寒草

枯朔風怒長嘶夜半呼孫陽

澹道人秋色梧桐圖

道人何故使我慘不樂寒烟叢沓空巖落西園氣
爽客登樓金井聲繁動鈴索亦有穠李華亦有園
中桃銅柯石榦豈不暢揮灑胡爲貌出濃氛縈拂
風蕭颯道人驅走東華道飽閱炎光覺秋好著色
悽迷任化工披牋黯澹還天巧當其落墨時候歛
風雨生粗枝大葉氣橫出披拂盡作秋聲鳴琅玕
一片赴瑤砌欲墮不墮疑鏗鏗遠憶梧宮報早秋

銀床夜冷露華稠都將暝影虛闌意寫入關山萬
里愁道人以我胷懷曠寄來命挂中堂上素幔渾
連翠影勻孫枝似有輕颺颺極目江關首重回涼
煙斷靄接層臺霜濃湘浦芙蓉落露滴幽巖蕙草
摧龍門亦有叅雲勢可奈西風鷓鴣來空檐踟躕
余心哀

送陳倫西歸秦州

八月居庸見雁飛霜秋蟻社鱖魚肥羣空冀北孫
陽老木落亭臯柳暉歸白髮漫悲明鏡客青山長

繞故園扉春蘿秋桂渾無恙好掬東溟浣素衣

晚出西直門

斜光餘翠微雲林澹初暝烟村人語響遠水殘霏
暎歸牧被山下驅牛叱荒逕涼蟬疎樹歇棲鳥深
煙定杖策向山歸溪流豁塵聽

雪中過鎮海寺

遙空低濕煙驅馬前山曙飛霰幾時下千巖忽已
素乳竇咽殘滴石溪屢經渡微高墟上煙稍暗峯
前樹沿緣蹋荒逕平田出微路空山聞誦經攜勝

過林去

秋夜寄石堂

嘉樹昏夕陰松際上初月澄輝動疏牖遙見數螢
沒夜靜寒露下微響出深樾窮巷數犬吠幽蟲語
初歇支枕澹相思坐聽孤鐘發

夜雨懷伯西

竟夕意不適蕭堂夜深雨披衣聽簷滴儼共伊人
語木葉下周除殘鐙耿寒宇寂寞懷夫君寒裳望
煙渚

西郊故明闕宦墓

黑膏迷太白神龍隨鱗魴婁豬化爲人天弧不可
降客行郊西道悼昔心慄傷顛風怒不休青燐燒
空桑高墉胡崔嵬石闕崇堂皇麒麟臥莓苔翁仲
森顏行華表樹龜趺結銜何煌煌尙衣迄司禮炙
手誰足當黃虬歸虛無魚鐙慘不光或恐浴重泉
雌蜺干天狼五鹿坐經席都尉學爛羊哀哉李杜
儔接摺趣珩楊華林視零露碧血流朝堂嘯羣劫
天子烈燄焚紅牆嗚呼何代中縱此含沙狂奉衣

奪婦媚宣詔假鴟張黃封出懷輿宰相不敢商我
善復我惡勁節摧嚴霜茄花旣騰趨委鬼倏跳跟
雄狐固窟穴孫子咸披猖穹碑勒護勅謀國非不
臧祖宗計弗用置心婦寺腸咸懷望天壽日墮驚
沙黃

晨赴香山道中作

入谷聞暗泉秋塘葦花亂露下石氣寒木落前山
見流烟忽明滅稍沒楓林半驅馬憶前期溫涼幾

回換

晚過石堂齋居

微雨止深竹碧空吐流雲靄靄散綺出澹澹人影
分索處意無豫憶我同心人驅車寒巷中烟景昏
夕曛入戶臨夜墀澄暉閉我神風漏入幽闥月林
散清真茶煙稍翫鬱妙香生靜聞婚嫁如可畢早
卜西山隣

西堂秋夕

雲影度銀浦碧天橫數星幽人眷良夜捉席暮山
青荷動觸虛籟竹深流暗螢遙思潞西客翠袖倚

風櫺

上方角鷹歌

上方角鷹胡錦毛星眸閃爍光如刀
錄鞞絡臂黃絙操陰崖激日翻秋鷹
尉羽戢翼勢飛動勁氣掣斷黃金條
盤空曾踏天山雪決雲驟起飛影滅
劍翎朝斷鵬鷁花奮拳夜擣狐狸穴
忽倏騰身入霄漢雨灑層空亂毛血
花裙胡兒不敢放羶廬遠獻千秋節
嚴郊底貢馳青驄鷹師祇候長楊宮
壯士臂歸動霹靂英標玉立凝清雄
厲吻空櫺眺寥泬

大翮疑落花門東坊開近在銅龍側永日嚴威動
八極鈴掣虛簷烏鵲馳影翻昏晝鴟鵂匿陰庭轉
瞬爍流電羣精潛喘夜惶惑是時大冬風怒號天
清海國盤霜雕木枯草短豺狼嗥豺豨獠獍接雕
尻棘枝凍雀唬寒臯鴟鴞鴟鴞相呼呶跂喙翔走
紛繹騷雕戈雪練迴幢旄鳴弦厲鏃揮孟勞凌空
一逝不可招高陵大谷追懸獰疾過釐睫馳修毫
河隄山槽窮搜牢毛羣羽族紛騰逃孤飛擇肉披
羶臊霜晴不動寒穹高下眎鷲鳥非吾曹

送何西嵐出守涼州

盲飈捲雪落如席城南老烏墮兩翼枯桑火出豺
虎怒走馬川頭石起立火山日上紅雲開赤旗羗
管臨城隈麒麟蹙帶黃驄迴涼州太守青天來何
郎燕領更河口秘策牙籤不離手崛起黔南雄萬
夫捃摭羲娥辨跟肘三年側足平津門意氣看君
獨忠厚摛藻羞分月露光蹋花不向朱門走與發
高筵騁雄辨舌翻霹靂蛟龍吼 天子巖邊擇召
公延之一麾迺出守丈夫讀書務實用雌伏青氊

亦何有昨朝召對承明殿黑貂寵賚雲錦段坐識
皇心念我師特教僊吏膺殊眷報國須爲赤子
謀起家未荷羣公薦我聞鳳皇臺近對西康州石
林寒日聲鳴啾使君玉節迴青油爲我一顧河之
洲桐華竹實陳朝羞屏驅鳩鵬除鶴鶴誠心餒飼
娛其儔使伊顏色敷潤聲和柔俾止于閣鳴天休
廟堂鐘鼓勞相求君行幾日蕭關道風捲燒當摧
百草潑水凌衾羗女唬飛霜剝面將軍老雪重高
旗疑不翻赤亭望斷東飛鳥錦筵伐鼓蓮釭明蘭

陵琥珀金盃傾北堂紅燭動離思西海舊鬼多
嗥聲燉煌酒泉古亭障鹽池滂澤開春耕下格底事
填陽城嗚呼下格底事填陽城使君何以籌蒼生

蘇武牧羝圖

似烟非煙霜凍鬚欲雪雲塞塗西海北海冰
膠臚釣耆鱓得陰飈噓麇麇足鶩鶩呼狙豬黃
獐潛伏墟有羴其首來于于非犖非牽亦非踰曰
粉緇羯厥壯殊矜矜澌澌誰謂無長肱不麾十指
瘖陰岡斷坂遨以娛或羣或友亦步趨寢訛降飲

朋與俱散坡嶮草草則枯凌兢帖耳儕厥徒何人
重戴氊裹襦短筆不假招蕃奴高舉玉節持不孤
翠旄歷落紆丹朱未央建章黃雲徂酸飈獵獵翻
干旗哀哉子卿今牧芻絕食大窖神女扶鞞淚慘
栗愁弗舒羝乳則歸歸或誣戕颺菅蒯甘不荼有
雪爲嚙旃爲茹阿誰寫真充顧厨鉛黃粉墨生態
紆麒麟漫漶丹青渝畢謹效死真丈夫少卿衛律
嗟哉都拜恩賜號封新除兩甄馳逐形魁梧驪騮
蕃碩來余吾祁連獵罷休氊廬醴漿鹿脯封馳酥

寒笳按拍聲嗚嗚紅羅綺組排妙姝地鑪獸爇紅
氍毹君獨胡爲拘橛株子卿善覷千金軀繳檠弓
弩良可圖上林雁帛來神書

月夜坐澹齋桐蔭書屋

積雪委墻隙不知明月上懸光蕩零素高楹湛虛
朗捉席理瑤瑟操縵豁深想除淨茗烟微幙動欄
輝爽涼徽汎深竹稍聞棲鳥響妙寄契無言梧陰
下幽幌

長城嶺歌

孤光倒空天有脚龍泉關頭礮車落旌竿曳雲頽
不高獐麕攫人大雪作行人帕首弓在腰霹靂脫
手饑鴟號草間狐兔不敢出馬蹄直上坡陁高
清時萬落通諸夏老兵吹笛長城下觝角常聞龍武
軍窺垣不見烏孫馬翻憶修關列格初指墮層冰
骨填野谿谷風悲凍更豪猶哭前朝築邊者雁門
雞鹿黃雲屯射虎川北驚蒿翻黃沙莽莽塞窮漠
天低日落焱輪奔子城縱目豁懷抱坐收萬幕歸
中原野濶天寒靜刁斗時聞野獸呼其羣是時大

石垂空走驅颶夜擣長城口舉頭觸關關不開倒
掣千山作牛吼北平守飛將軍祁連纒得無烽塵
孤塗入侍獻鷹馬於軒老上今陪臣卽如此關闌
千刻畫形空存殺人善戰胡足云安得生炙黃羊
一杯酒與爾射麀逐鹿老作藍田叟

送用晦之官畱都

酒盡紅亭擁白駒望郎冬省綬新加窮邊立雪天
如墨匹馬嘶風劍有花豐沛至今歌漢澤提封振
古戴天家短衣射虎平生事好逐春蓬咏五豨

東臯二首

抱寂迷家辰稍見庭草綠攜杖過東菑芳原散耕
牧荒煙一鳥下斜日數峯曲好隨采樵侶來伴山
翁祝

陂塘靄新綠暄陽散朝華佳雨霽芳塋肅肅天桃
花文鱗動冰沼乳燕喧春芽良時念耕稼倚杖談
桑麻

郊墅春行過萬柳堂

白鼻流蘇牋驕嘶踏碧煙峯紋縈檻綠浪彩蕩空

鮮柳帶迷文杏苔花綴古錢繁華初地歇抱鬱意
悽然

洪善寺靜觀堂

祇園足春物游絮結團飛日午碧苔合竹房清磬
稀風鈴驚佛鳥雲葉綴僧衣趺坐念心寂無因住
翠微

豐臺王氏園

孤筇曳青苔院靜禽鳥樂幽懷憺不極獨行果前
約綠蘿暗荒逕流雲帶晴閣夜來微雨過青林數

花落水木明朝華陂塘翳烟薄和風散微溫芳叢
扇紅藥幽陰澄近原修綠浮新郭遙辨荷鋤人高
檐聽牛鐸

園居夏夜

清池謝纖暑岸幘臨冰除徐步聞暗香涼風泛紅
蕖明月稍東上悄然來清虛遙樹影微得近水光
欲無人聲過前林迢迢歸煙墟彷彿說禾稼笑語
良可娛願祝百室盈吾亦欣安居

使粵別家

老親攜手送病婦沾巾顧依依去兄弟切切共徒
御塗魂眷春帷居愁憶秋戍貧知離別難病覺風
烟暮曉霧隱房山夜雲蔽湘樹驅馬復徘徊日高
不能去

固節曉發

夢破聞騰裝童僕夜深聒寒衣赴修吟林端耿殘
月獨客重離鄉麾鞭意未決星澹荒雞啼霧重蒼
林闕時聞原上鈴遠向煙中沒遙影生大房朝光
上超忽惆悵萬里遊含悽念華髮

洪恩寺

客行大房道朔吹驚塵昏野煙澹白日觚稜上初
噉丹霞出天際石壇颺華旛咄嗟何王時闕此象
教尊金碧麗層闕檜栢繚周垣洞門香樹匝怖鴿
深林喧我非虎賁郎爾胡驚翩翻鐘魚散晨唄佛
香噓春温法輪日夜旋不轉天地根鬼伯肩隱願
賓迎卷肘跟迷悲悟亦啼凡聖同憂煩弗聞耕鑿
徒乃或瀉其元層檐俯大漠披豁掀乾坤烟驅碣
石出焱轉滹沱奔連山馳崩濤蒼然歸海門埃翻

遠黃動峽倒高青吞迴首叫閶闔瑤象疑軒軒嗟
哉黃鵠馳拜手辭鸞鴛不如原上鴿刷羽邀春園
我母應望我高樓闕重闈望之不可見哀哉將誰
論

賈閩仙墓

騎驢行荒山寒封隱桑柘晚光動林墅迢迢見僧
舍樹影拂苔碑陰壇數鴻下白日隱榛蕪青燐澹
長夜平生酒脯意采蘋及清暇親足憶吟魂酌酒
寒墟罷

寄題雲壑草堂四首

斜日滿煙落開扇廉讓閒巡檐蹋黃葉采菊見南山
流水靜如此片雲相與閒昨來聞習定竟日掩
松關

衆綠被牆趾蕭然蘿薜陰一谿明霽壑半畝亦雲
林柳是先生種松如靜者心時來北牕臥流與滿
青岑

昔懷巖下客因造林間廬日夕散煙鳥幽人方荷
鋤秋風動鷓鴣種蕙比何如遙憶忍饑者石牀繙

道書

舊出烏衣系今成谷口身閒披種樹傳老作看花
人魚鳥爲知己煙霞自寫真待尋餐玉訣來結孟
家隣

大谷山堂集卷二